

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-1039/07  
Sarajevo, 29.11.2007. godine

**Z A P I S N I K**  
**9. SJEDNICE DOMA NARODA PARLAMENTA FEDERACIJE BOSNE I  
HERCEGOVINE, održane 27. novembra 2007. godine**

Sjednica je počela u 11.13.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, predsjednicu Federacije Bosne i Hercegovine Borjanu Krišto, potpredsjednicu Federacije Spomenku Mičić, premijera Nedžada Brankovića, zamjenika premijera Gavrila Grahovca, ministre u Vladi Federacije Bosne i Hercegovine, predstavnike udruženja, međunarodnih organizacija, goste i predstavnike akreditiranih medijskih kuća koji prate rad sjednice.

Na osnovu evidencije Stručne službe, predsjedavajući je konstatovao da sjednici prisustvuje 45 delegata, što čini većinu, te Dom naroda može raditi i punovažno odlučivati.

Na Zapisnik 8. sjednice Doma naroda Parlamenta Federacije Bosne i Hercegovine, održane 08.11.2007. godine, primjedbe su dali Ivo Komšić i Lidija Bradara.

Ivo Komšić dao je primjedbu da se zaključak koji je on predložio u vezi sa 2. tačkom dnevnog reda - Prijedlog Zakona o izmjenama i dopunama Zakona o vraćanju i dodjeli i prodaji stanova na kojim postoji stanarsko pravo, ne nalazi u zapisniku.

Lidija Bradara je dala primjedbu da se i njen zaključak koji se, također, odnosi na 2. tačku dnevnog reda, ne nalazi u zapisniku.

Zbog ovih primjedbi predsjedavajući je predložio da se usvajanje Zapisnika 8. sjednice odloži za narednu sjednicu, što su delegati i prihvatili.

Nakon toga predsjedavajući je podsjetio delegate da, na osnovu člana 104. Poslovnika o radu Doma naroda, mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

## Delegatska pitanja i inicijative

**Elvira Abdić-Jelenović** izrazila je nezadovoljstvo što još nije dobila odgovor na pitanje koje je uputila Vladi Federacije, premijeru Nedžadu Brankoviću i resornim ministrima u vezi sa statusom „Agrokomerc“ d.d. i zatražila da joj se odgovori dostave najkasnije do sljedeće sjednice.

Također, napomenula je da nije dobila zatraženi zapisnik Vijeća komisije za ljudska prava kao i Odluku o ukidanju privremene mjere zabrane otuđenja imovine „Agrokomerca“.

Pokrenula je inicijativu da Visoki predstavnik za Bosnu i Hercegovinu, u skladu sa svojim ovlastima, zaštiti prava nezaposlenih dioničara „Agrokomerca“ tako što će osigurati provođenje Odluke Doma za ljudska prava i zabraniti održavanje Skupštine dioničara do okončanja svih sudskih sporova koje vodi ovo Udruženje protiv Federacije Bosne i Hercegovine pred domaćim i međunarodnim sudovima.

**Saša Magazinović** je zatražio da mu do naredne sjednice premijer Nedžad Branković i ministri u Vladi Federacije dostave odgovore u vezi sa brojem savjetnika koji vrše funkcije u zakonodavnoj i izvršnoj vlasti.

Također, zatražio je da mu se dostavi informacija o provođenju Zakona o principima lokalne samouprave u Federaciji.

Postavio je pitanje da li postoje sankcije, koje su i ko ih snosi u slučaju kad institucije vlasti ne poštuju zakone.

**Fahrudin Skopljak** je uputio inicijativu Vladi Federacije, odnosno Ministarstvu pravde da predloži izmjene i dopune Zakona o sudovima u Federaciji Bosne i Hercegovine u dijelu u kojem je uspostavljena mreža sudova u Federaciji, a s ciljem ponovne uspostave, odnosno osnivanja Općinskog suda u Lukavcu.

**Drago Puzigaća** je uputio pitanje Centralnoj izbornoj komisiji u vezi sa kašnjenjem dodjele mandata delegatu iz reda srpskog naroda kako bi Klub delegata srpskog naroda bio popunjen.

**Besim Imamović** je uputio dva pitanja Vladi Federacije i Federalnoj upravi za inspekcijske poslove.

Prvo pitanje se odnosi na nekontrolisan rast cijena osnovnih prehrambenih artikala.

Drugo pitanje je zašto nema kontinuirane akcije sprječavanja "rada na crno".

**Josip Perić** je postavio pitanje u vezi sa stanjem i budućnošću Hercegovačke banke, te o angažmanu privremene upraviteljice Tobi Robinson.

**Muhamed Osmić** je uputio dva pitanja Vladi Federacije.

Prvo pitanje se odnosi na to zašto Federalna direkcija za izgradnju, upravljanje i održavanje autocesta još nije uradila projekt rješavanja problema Jelovačke petlje u Maglaju na putu M-17.

Drugo pitanje se odnosi na nedozvoljavanje preduzeću HN „Promet“ prilaz sa postojećeg prilaznog puta na M-17.

Na prvo pitanje odgovor je na sjednici dao premijer Federacije Nedžad Branković.

**Tomo Vidović** je postavio dva delegatska pitanja.

Prvo pitanje je uputio Kolegiju Doma naroda a tiče se njegove inicijative za pokretanje postupka izrade programa rada Doma naroda za 2007. godinu.

Drugo pitanje je uputio Federalnom ministarstvu zdravstva a odnosi se na aktivnosti Ministarstva na izmjenama i dopunama Odluke o normativima i standardima u primarnoj zdravstvenoj zaštiti.

**Mislav Sučić** je uputio pitanje Federalnom ministarstvu energije, rudarstva i industrije koliko će od predviđenih 15,5 miliona KM za iduću godinu, predviđenih za poticaj proizvodnje i restrukturiranje industrije i rudarstva dobiti, Kanton 10 – Livno.

\* \* \*

Nakon postavljenih delegatskih pitanja i pokrenutih inicijativa prešlo se na utvrđivanje dnevnog reda.

Predsjedavajući je obavijestio delegate da je Vlada Federacije dostavila Prijedlog Zakona o izmjenama i dopunama Zakona o prodaji stanova na kojima postoji stanarsko pravo i Prijedlog Zakona o finansijskoj konsolidaciji Javnog preduzeća Željeznice Federacije BiH, d.o.o. Sarajevo za period od 01.01.2008. do 31.12.2012. godine da se razmatraju po hitnom postupku.

U vezi sa ovim prijedlozima razvila se diskusija u kojoj su učestvovali: Jasenko Tufekčić, predsjednik Kluba delegata bošnjačkog naroda, Josip Perić, predsjednik Kluba delegata hrvatskog naroda, Mira Ljubijankić, predsjednica Kluba delegata srpskog naroda, Nedžad Branković, premijer Federacije i Svetozar Pudarić.

Predsjedavajući je pozvao delegate da se izjasne o prvom prijedlogu i konstatovao da je Dom naroda Parlamenta Federacije Bosne i Hercegovine, sa 35 glasova za i uz 17 uzdržanih glasova, prihvatio da se Prijedlog Zakona o izmjenama i dopunama Zakona o prodaji stanova na kojima postoji stanarsko pravo razmatra po hitnom postupku.

Nakon toga Jasenko Tufekčić je, u ime Kluba delegata bošnjačkog naroda, zatražio da se izjašnjavanje o ovom Zakonu vrši prema proceduri predeviđenoj za vitalni nacionalni interes.

Usljedio je izjašnjavanje u vezi sa drugim prijedlogom.

S obzirom na to da je izražena sumnja u rezultate glasanja, glasanje je ponovljeno poimeničnim prozivanjem, koje je obavio sekretar Doma naroda Izmir Hadžiavdić.

Na osnovu rezultata poimeničnog glasanja, predsjedavajući je konstatovao da Dom naroda Parlamenta Federacije Bosne i Hercegovine nije prihvatio se Prijedlog Zakona o finansijskoj konsolidaciji Javnog preduzeća Željeznice Federacije BiH d.o.o. Sarajevo za period od

01.01.2008. do 31.12.2012. godine razmatra po hitnom postupku, pa će se Zakon razmatrati u redovnoj proceduri tj. u formi nacрта.

Predsjedavajući je podsjetio delegate da je dostavljen i Prijedlog Zakona o izmjenama i dopunama Zakona o početnom bilansu stanja preduzeća i banaka (predlagač: Zahid Mustajbegović Dajo, zastupnik u Predstavničkom domu) sa prijedlogom da se razmatra po hitnom postupku.

Na osnovu rezultata glasanja, predsjedavajući je konstatovao da Dom naroda Parlamenta Federacije Bosne i Hercegovine nije prihvatio da se Prijedlog Zakona o izmjenama i dopunama Zakona o početnom bilansu stanja preduzeća i banaka razmatra po hitnom postupku, pa će se Zakon razmatrati u redovnoj proceduri tj. u formi nacрта.

Predsjedavajući je podsjetio delegate da su dostavljeni Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica (predlagač: Asim Mekić, delegat u Domu naroda) i Prijedlog Zakona o izmjenama i dopunama Zakona o bankama (predlagač: Nermin Nikšić, zastupnik u Predstavničkom domu) sa prijedlogom da se razmatraju po skraćenom postupku.

Na prijedlog predlagača, Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica je povučen iz procedure na rok od dva mjeseca.

Potom se Dom naroda izjašnjavao u vezi sa prijedlogom da se Prijedlog Zakona o izmjenama i dopunama Zakona o bankama (predlagač: Nermin Nikšić, zastupnik u Predstavničkom domu) razmatra po skraćenom postupku.

S obzirom na to da je izražena sumnja u rezultate glasanja, glasanje je ponovljeno poimeničnim prozivanjem, koje je obavio sekretar Doma naroda Izmir Hadžićević.

Na osnovu rezultata poimeničnog glasanja, predsjedavajući je konstatovao da Dom naroda Parlamenta Federacije Bosne i Hercegovine nije prihvatio da se Prijedlog Zakona o izmjenama i dopunama Zakona o bankama razmatra po skraćenom postupku, pa će se Zakon razmatrati u redovnoj proceduri.

Nakon toga Svetozar Pudarić je, u ime predlagača Nermina Nikšića, zatražio da se Nacrt Zakona o izmjenama i dopunama Zakona o bankama povuče iz procedure.

Mirsad Pindžo je, u ime Odbora za pravdu, opću upravu i lokalnu samoupravu i Kluba delegata bošnjačkog naroda, predložio da se tačke - Prijedlog Odluke o izmjenama Odluke o utvrđivanju Igmana, Bjelašnice, Treskavice i kanjona rijeke Rakitnice (Visočica) područjem od značaja za Federaciju Bosne i Hercegovine i Prijedlog Odluke o pristupanju izradi prostornog plana područja posebnih obilježja od značaja za Federaciju Bosne i Hercegovine - Igman, Bjelašnica, Treskavica i kanjon rijeke Rakitnice (Visočica) za period od 2007. do 2027. godine - skinu sa dnevnog reda, što potpredsjednik Vlade Federacije Gavriilo Grahovac nije prihvatio, kao ni delegati nakon glasanja.

Mira Ljubijankić je, u ime Kluba delegata srpskog naroda, predložila da se 8. tačka predloženog dnevnog reda - Politika privatizacije državnog kapitala u Federaciji Bosne i Hercegovine sa Programom javnih investicija - prioriteta razvojnih projekata u Federaciji Bosne i Hercegovine, razmatra u formi nacrt, što su delegati prihvatili. Predstavnički dom je ovaj dokument , također, razmatrao u formi nacrt.

Predsjedavajući je obavijestio delegate da Kolegij doma naroda predlaže de se kao 13. tačka razmatra Prijedlog Zajedničke komisije oba doma Parlamenta Federacije za rješenje spornih pitanja u Prijedlogu Zakona o preuzimanju prava i obaveza osnivača nad ustanovama socijalne zaštite u Federaciji Bosne i Hercegovine i Prijedlogu Zakona o izmjenama i dopunama Zakona o privrednim društvima, što su delegati prihvatili.

Potom je predsjedavajući pročitao dnevni red.

Prije izjašnjavanja o dnevnom redu Zahid Mustajbegović Dajo je povukao iz procedure Nacrt Zakona o izmjenama i dopunama Zakona o početnom bilansu stanja preduzeća i banaka.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 49 glasova za, uz jedan glas protiv i uz tri uzdržana glasa, usvojio sljedeći:

## **D N E V N I R E D**

1. Prijedlog Zakona o izmjenama i dopunama Zakona o prodaji stanova na kojima postoji stanarsko pravo – hitni postupak,
2. Nacrt Zakona o finansijskoj konsolidaciji Javnog preduzeća Željeznice Federacije BiH d.o.o. Sarajevo za period od 01.01.2008. do 31.12.2012. godine,
3. Prijedlog Odluke o izmjenama Odluke o utvrđivanju Igmana, Bjelašnice, Treskavice i kanjona rijeke Rakitnice (Visočica) područjem od značaja za Federaciju Bosne i Hercegovine,
4. Prijedlog Odluke o pristupanju izradi prostornog plana područja posebnih obilježja od značaja za Federaciju Bosne i Hercegovine - Igman, Bjelašnica, Treskavica i kanjon rijeke Rakitnice (Visočica) za period od 2007. do 2027. godine,
5. Nacrt Politike privatizacije državnog kapitala u Federaciji Bosne i Hercegovine sa programom javnih investicija - prioriteta razvojnih projekata u Federaciji Bosne i Hercegovine,
6. Program razvoja poduzetništva i obrta u Federaciji Bosne i Hercegovine – «Stanje razvijenosti i prijedlog mjera za rast i razvoj malog i srednjeg poduzetništva u Federaciji Bosne i Hercegovine (2007-2010.)»,
7. Statut Zavoda za Javno zdravstvo Federacije Bosne i Hercegovine,

8. Izvještaj o izvršenju Budžeta Federacije Bosne i Hercegovine za period januar- avgust 2007. godine,
9. Informacija o problematici vezanoj za projekt «Gornji horizonti» sa zaključcima Vlade Federacije Bosne i Hercegovine,
10. Prijedlog za rješavanje spornih pitanja u:
  - Prijedlogu Zakona o preuzimanju prava i obaveza nad ustanovama socijalne zaštite u Federaciji Bosne i Hercegovine,
  - Prijedlog Zakona o izmjenama i dopunama Zakona o privrednim društvima (predlagač: Asim Mekić, delegat u Domu naroda).

## **1. Prijedlog Zakona o izmjenama i dopunama Zakona o prodaji stanova na kojima postoji stanarsko pravo**

Prijedlog Zakona utvrdila je Vlada Federacije.

Predstavnički dom je na 6. sjednici, održanoj 30.10.2007. godine, usvojio Prijedlog Zakona sa pet amandmana koje je Vlada Federacije prihvatila pa su postali sastavni dio Prijedloga Zakona.

Na Prijedlog Zakona amandmane su podnijeli: Zaim Imamović jedan amandman, koji se odnosi na dodavanje novog člana 6. i Jasenko Tufekčić, u ime Kluba delegata bošnjačkog naroda, dva amandmana, koji se odnose na član 2. i dodavanje novog člana 6.

Zakon su razmatrala nadležna radna tijela i dostavila svoje izvještaje.

Ispred Odbora za prostorno uređenje, ekologiju i stambeno-komunalne poslove Izvještaj je obrazložila Elvira Abdić-Jelenović.

Na početku rasprave Klub delegata bošnjačkog naroda predao je zahtjev za razmatranje ovog Zakona po proceduri predviđenoj za zakone za koje je pokrenut vitalni nacionalni interes. Zahtjev je potpisalo 14 delegata.

U pretresu su učestvovali: Jasenko Tufekčić, Asim Mekić, Igor Rajner, Dženana Zlatar, Josip Perić, Muhamed Osmić i Svetozar Pudarić.

Predsjedavajući je predložio da se izjašnjavanje o ovom Zakonu odgodi dok se Vlada Federacije ne izjasni o predloženim amandmanima.

## **2. Nacrt Zakona o finansijskoj konsolidaciji Javnog preduzeća Željeznice Federacije BiH d.o.o. Sarajevo za period od 01.01.2008. do 31.12.2012. godine**

Zakon u formi prijedloga utvrdila je Vlada Federacije, ali je Dom naroda u prethodnom postupku odlučio da ga razmatra u redovnoj proceduri, tj u formi nacrta.

Predstavnički dom je na 7. sjednici, održanoj 20.11.2007. godine, usvojio ovaj Zakon u formi prijedloga u tekstu kako ga je predložila Vlada Federacije.

Zakon su razmatrala nadležna radna tijela i dostavila svoje izvještaje. Ispred Vlade Federacije Zakon je obrazložio Izet Mehinagić.

U pretresu su učestvovali: Mislav Sučić, Tomo Vidović, Besim Imamović, Svetozar Pudarić, Josip Perić, Lidija Bradara, Muhamed Osmić i Izet Mehinagić.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, jednoglasno (35 glasova za), usvojio sljedeći:

## **ZAKLJUČAK**

1. Dom naroda Parlamenta Federacije Bosne i Hercegovine prihvata Nacrt Zakona o finansijskoj konsolidaciji Javnog preduzeća Željeznice Federacije BiH d.o.o. Sarajevo za period od 01.01.2008. do 31.12.2012. godine i smatra da može poslužiti kao osnov za izradu prijedloga Zakona.
2. Zadužuje se Vlada Federacije Bosne i Hercegovine da prilikom izrade prijedloga Zakona ima u vidu prijedloge, primjedbe i sugestije iznesene na sjednici.
3. **Prijedlog Odluke o izmjenama Odluke o utvrđivanju Igmana, Bjelašnice, Treskavice i kanjona rijeke Rakitnice (Visočica) područjem od značaja za Federaciju Bosne i Hercegovine**

Odluku je utvrdila je Vlada Federacije.

Predstavnički dom je na nastavku 7. sjednice, održane 21.11.2007. godine, donio ovu Odluku sa jednim amandmanom, koji je Vlada Federacije prihvatila pa je postao sastavni dio Odluke.

Na Prijedlog Odluke Mirsad Pindžo je podnio amandman koji se odnosi na tačku 1. stav 2.

Odluku su razmatrala nadležna radna tijela i dostavila svoje izvještaje.

U raspravi je učestvovao Mirsad Pindžo.

Predsjedavajući je predložio da se izjašnjavanje o Odluci odgodi dok se Vlada Federacije ne izjasni o podnesenom amandmanu.

4. **Prijedlog Odluke o pristupanju izradi prostornog plana područja posebnih obilježja od značaja za Federaciju Bosne i Hercegovine - Igman, Bjelašnica, Treskavica i kanjon rijeke Rakitnice (Visočica) za period od 2007. do 2027. godine**

Odluku je utvrdila Vlada Federacije.

Predstavnički dom je na nastavku 7. sjednice, održane 21.11.2007. godine, odgodio izjašnjavanje o ovoj Odluci dok se Vlada Federacije ne izjasni o podnesenim amandmanima.

Na prijedlog Odluke Mirsad Pindžo je podnio tri amandmana koji se odnose na tačku 5. stav 3., tačku 6. stav 2. i na tačku 15.

U raspravi nije niko učestvovao.

Predsjedavajući je predložio da se izjašnjavanje o Odluci odgodi dok se Vlada Federacije ne izjasni o podnesenim amandmanima.

## **5. Nacrt Politike privatizacije državnog kapitala u Federaciji Bosne i Hercegovine sa Programom javnih investicija - prioriternih razvojnih projekata u Federaciji Bosne i Hercegovine**

Vlada Federacije je dostavila Politiku privatizacije državnog kapitala u Federaciji Bosne i Hercegovine sa Programom javnih investicija - prioriternih razvojnih projekata u Federaciji Bosne i Hercegovine, na razmatranje i davanje saglasnosti, a Dom naroda je u prethodnom postupku odlučio da ovaj dokument razmatra u formi nacra.

Predstavnički dom je na nastavku 7. sjednice, održane 21.11.2007. godine, odgodio izjašnjavanje o ovim dokumentima dok se ne usaglase predloženi zaključci.

Dokumente su razmatrala nadležna radna tijela i dostavila svoje izvještaje.

U raspravi su učestvovali: Elvira Abdić-Jelenović, Tomo Vidović, Igor Rajner, Slobodan Rodić, Besim Imamović, Svetozar Pudarić, Mira Ljubijankić, Lidija Bradara i Muhamed Osmić.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 33 glasa za, uz dva glasa protiv i uz četiri uzdržana glasa, usvojio sljedeći:

### **ZAKLJUČAK**

1. Dom naroda Parlamenta Federacije Bosne i Hercegovine prihvata Nacrt Politike privatizacije državnog kapitala u Federaciji Bosne i Hercegovine sa Programom javnih investicija - prioriternih razvojnih projekata u Federaciji Bosne i Hercegovine i smatra da može poslužiti kao osnova za izradu prijedloga ovog dokumenta.
2. Zadužuje se Vlada Federacije Bosne i Hercegovine da prilikom izrade prijedloga ovog dokumenta ima u vidu prijedloge, primjedbe i sugestije iznesene na sjednici.



## **6. Program razvoja poduzetništva i obrta u Federaciji Bosne i Hercegovine – «Stanje razvijenosti i prijedlog mjera za rast i razvoj malog i srednjeg poduzetništva u Federaciji Bosne i Hercegovine (2007-2010.)»**

Program razvoja poduzetništva i obrta u Federaciji Bosne i Hercegovine – «Stanje razvijenosti i prijedlog mjera za rast i razvoj malog i srednjeg poduzetništva u Federaciji Bosne i Hercegovine (2007-2010.)» utvrdila je Vlada Federacije i dostavila Parlamentu Federacije na razmatranje.

Program su razmatrala nadležna radna tijela i dostavila svoje izvještaje.

Program su obrazložili Velimir Kunić, federalni ministar razvoja, poduzetništva i obrta i Jozo Bejić, sekretar Ministarstva.

U raspravi su učestvovali: Tomo Vidović, Jozo Bejić, Elvira Abdić-Jelenović, Svetozar Pudarić, Velimir Kunić, Drago Puzigaća, Mislav Sučić i Lidija Bradara.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, jednoglasno (43 glasa za), prihvatio Program razvoja poduzetništva i obrta u Federaciji Bosne i Hercegovine – «Stanje razvijenosti i prijedlog mjera za rast i razvoj malog i srednjeg poduzetništva u Federaciji Bosne i Hercegovine (2007-2010.)».

## **7. Statut Zavoda za Javno zdravstvo Federacije Bosne i Hercegovine**

Statut Zavoda za javno zdravstvo Federacije Bosne i Hercegovine utvrdilo je Upravno vijeće Zavoda za Javno zdravstvo Federacije Bosne i Hercegovine. Vlada Federacije je prihvatila Statut i dostavila ga Parlamentu Federacije Bosne i Hercegovine na razmatranje i davanje saglasnosti.

Statut su razmatrala nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, jednoglasno (43 glasa za), donio Odluku o davanju saglasnosti na Statut Zavoda za Javno zdravstvo Federacije Bosne i Hercegovine.

## **8. Izvještaj o izvršenju Budžeta Federacije Bosne i Hercegovine za period januar- avgust 2007. godine**

Vlada Federacije dostavila je ovaj Izvještaj Parlamentu Federacije na razmatranje.

Izvještaj su razmatrala nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 38 glasova za, uz jedan glas protiv i tri uzdržana glasa, usvojio sljedeći:

## **ZAKLJUČAK**

Dom naroda Parlamenta Federacije Bosne i Hercegovine prihvata Izvještaj o izvršenju Budžeta Federacije Bosne i Hercegovine za period januar-avgust 2007. godine.

### **9. Informacija o problematici vezanoj za projekt «Gornji horizonti» sa zaključcima Vlade Federacije Bosne i Hercegovine**

Vlada Federacije je Parlamentu Federacije dostavila Informaciju o problematici vezanoj za projekt «Gornji horizonti» sa zaključcima na razmatranje.

Informaciju su razmatrala nadležna radna tijela i dostavila svoje izvještaje.

Informaciju je obrazložio Damir Ljubić, federalni ministar poljoprivrede, vodoprivrede i šumarstva.

U raspravi je učestvovao Igor Rajner.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 45 glasova za i uz jedan uzdržani glas, usvojio sljedeći:

## **ZAKLJUČAK**

Dom naroda Parlamenta Federacije Bosne i Hercegovine prima k znanju Informaciju o problematici vezanoj za projekt «Gornji horizonti» sa zaključcima Vlade Federacije Bosne i Hercegovine.

### **10. Prijedlog za rješavanje spornih pitanja u:**

- **Prijedlogu Zakona o preuzimanju prava i obaveza nad ustanovama socijalne zaštite u Federaciji Bosne i Hercegovine**
- **Prijedlogu Zakona o izmjenama i dopunama Zakona o privrednim društvima (predlagač: Asim Mekić, delegat u Domu naroda)**

Zajednička komisija za usaglašavanje različito izglasanih tekstova prijedloga zakona u oba doma Parlamenta Federacije Bosne i Hercegovine na sjednici, održanoj 15.11.2007. godine, razmatrala je različito izglasane tekstove sljedećih prijedloga zakona:

- Prijedlog Zakona o preuzimanju prava i obaveza nad ustanovama socijalne zaštite u Federaciji Bosne i Hercegovine
- Prijedlog Zakona o izmjenama i dopunama Zakona o privrednim društvima (predlagač: Asim Mekić, delegat u Domu naroda).

**- Prijedlog Zakona o preuzimanju prava i obaveza nad ustanovama socijalne zaštite u Federaciji Bosne i Hercegovine**

Zajednička komisija predložila je Predstavničkom domu da usvoji Prijedlog Zakona u tekstu kako ga je usvojio Dom naroda, odnosno da odustane od svoja tri amandmana.

**- Prijedlog Zakona o izmjenama i dopunama Zakona o privrednim društvima (predlagač: Asim Mekić, delegat u Domu naroda)**

Zajednička komisija predložila je Domu naroda da odustane od izglasanog Amandmana, tj. da usvoji Prijedlog Zakona u tekstu kako ga je usvojio Predstavnički dom.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, jednoglasno (sa 46 glasova za), prihvatio Prijedlog za rješenje spornih pitanja u tekstu Prijedloga Zakona o izmjenama i dopunama Zakona o privrednim društvima, tj. odustao je od Amandmana koji se odnosi na dodavanje stava 2. u članu 1.

\* \* \*

Nakon toga sjednica je završena u 18.45 s tim da će se rad po tač. 1., 3. i 4. nastaviti u okviru narednih sjednica Doma naroda .

Transkript sa sjednice čini sastavni dio Zapisnika.

SEKRETAR

Izmir Hadžiavdić

PREDSJEDAVALAČI

Stjepan Krešić